

SCOLA

Claudio Valentini a cef de la Scola de Fascia

Jà Vicarie de l'istituzion formativa de val, l'è stat nominà sostitut del Sorastant per l'an de scola 2020-2021

Sarà Claudio Valentini a rejer la Scola Ladina de Fascia te l'an scolastich che pearà via ai 14 de setember. L'onom era jà stat portà dant enche su La Usc via per la setemènes passèdes, te l'anunzièr l'pensionament de la Sorastanta, ma l'encèria ofizièla é stata data sù demò chisc dis, dò la delibera de la Jonta provinzièla de en vender ai 21 de aost.

Tè la delibera se lec che per l'an de scola 2020/2021 l'encèria de sostitut del Sorastant de la Scola Ladina ge é stata data sù al signor Claudio Valentini, che rejarà l'istituzion endèna che vegn endrezà n concors aposta per cerner la figura de Sorastant. La Jonta à tout la dezijion con chela de ge dèr continuità a l'istituzion e dò aer vedù la nota di 6 de aost con chela che la Procuradora del Comun General de Fascia se disc a una con chest inom.

Valentini, che da n muie de egn l'ensegna te la Scola de Fascia e da 14 egn l'è l'encèria de Vicarie, l ne à dit che per el l'è n onor ma enche n peis tor sù chesta encèria te sie ultim an de lurier, ajache te n an enche el l jirà en penscion. L'è dit che l »ciaparà la chieves« col prum de setember, canche la Sorastanta jirà en penscion, ma che jà da n pèr de setemènes l'è dò a lurèr en cordanza con ela per scomenzèr ben e no straoujer l bon lurier che la Sorastanta l'è fat te chisc egn passé.

»Con chesta emergenza sanitàera l'è n moment senester per i dirigenc de scola – l ne à dit – e cognon vardèr de endrezèr dut acioche ai 14 de setember se posse averjer delvers e en segurezza. Podon fèr cont su na bona colaborazion con duc i Comuns patrons de la structures te val e con l Comun general de Fascia per chel che vèrda la mensa e i etres servijes.

Più senestra l'è la pèrt di trasport, ajache te provinzia no l'è a la leta de etres mesi e per chest no sarà possibil mudèr i oraries. Nos vardaron de portèr inant l'atività normala te ogne nivel de scola – à dit amò Valentini – ampò ge volarà aer maor atenzion te la gestion de la clas, e per ejempie te l'artistich no sarà più possibil per i studenc se mever fora per la desvaliva aules coche i era usé a fèr, ma sarà i insegnanc a se mever: demò ti laboratories se sà ben i cognarà poder jir. Cognaré lurèr n muie de più – à feni fora Valentini – e spere de esser bon de tor duta la dezijions giustes.»

Enche nos se auguron ben segur che el e duta la Scola Ladina de Fascia posse peèr via l nef an de scola te la vida miora.

Lucia Gross



Claudio Valentini rejarà la Scola de Fascia te l'an de scola 2020-2021.